

PAULO ENA REVAREVA EFESO TAUDIA EDIA

¹ Lau Paulo, Keriso Iesu ena aposetolo taugu, Dirava ena ura dainai, helaāga taumui Efeso ai, Keriso Iesu o abidadama heniamu taumui, na tore henimuimu: ² harihari-bada bona maino, Tamada Dirava ena amo bona Lohiabada Iesu Keriso ena amo, bavabi.

Ihamaurimui dalana

³ Dirava, eda Lohiabada Iesu Keriso Tamana, aita hanamo: ia ese Keriso lalonai Lauma ena hahenamo iboudiai guba ai e miamu ġaudia na vada e hanamolaida. ⁴ Tanobada do se karaia negana ai, Dirava ese Keriso lalonai e abida hidi, ia vairanai helaāga tauda ai bona asi bebekabebekada tauda ai baitala helaoreana. Ena lalokau dainai ⁵ ia ese lalona e hadaia guna, ia natuna ai baine halaoda Iesu Keriso dainai. Ina na ena ura namona heġereġerena. ⁶ Ena harihari-bada ġoeva-däena, ina na ena lalokau tauna ai vada e hatagħalaida hariharina, dainai baita imodaia.

⁷ Ia lalonai hahemauri vada ta abiamu, ia rarana dainai, bona eda dika vada eme hegħwau tao. Ina na ena harihari-bada ġoeva-däena ⁸ vada e habada iseda ai. ⁹ Badina be ena aonega ai bona ena lalo-parara ai, Dirava ese ena lalohadai heħunidia vada e hadibada, ena ura namona Keriso lalonai e rataia heġereġerena, ¹⁰ negadja bae ġugħuru ai na ġau iboudiai, guba ġaudia

bona tanobada ġaudia, Keriso ai baine haboudia helaoreana.

¹¹ Badina be Dirava ese ġau iboudiai na ena lalohadai heġereġerena e karamu. Bona matamana negana ai Dirava ese e gwauraimai hid, ena ura ihagūġuruna. ¹² Taunabunai ai Keriso a laroa gunava taumai ese ia hairaina baia heatolaia. ¹³ Ia lalonai danu umui ese hereva momokanina, emui hahemauri sivaraina namona, o abia dae. Umui ese danu Keriso o abidadama henia bona Dirava ese ia toana e tlenimui, Lauma Helaġa, e gwaurai hamata Lau mana, bunai. ¹⁴ Toana bunai, ita ese ahuda baita abia Dirava ena gwauhamata hegereġerena, bona ia ese ena taunimanima baine hamauridia. Ia hairaina baita heatolaia hebou.

Dirava na ġuriamu daimui ai

¹⁵ Badina bunai, Lohiabada Iesu Keriso o abidadama heniamu bona helaġa taudia iboudiai o lalokau henidiamu sivaraina na kamonai dainai, ¹⁶ egħi Dirava ihanamona na asi dokona daimui ai. Bona daimui ai na ġuriġurimu, ¹⁷ eda Lohiabada Iesu Keriso ena Dirava, Tamada herea-daena, ese aonega bona lalo-parara laumanā baine hemimui, bena ienai ba manada. ¹⁸ Lalomui matadia danu baine hapapa, bena ena boiboi helarona bona ahuna herea-daena, davana bada ġauna helaġa taudia edia, vada ba diba. ¹⁹ Iena siahu badana bona ena goada hereadaena ita kamonai tauda edai danu ba diba. ²⁰ Siahuna bunai Keriso enai e hedinarai: ia ese mase amo e hatorea isi, guba ai vada e abia dae, ia idibana kahana ai e hahelaia. ²¹ Keriso na

ḡaubada iboudiai daediae, gavana iboudiai daediae, siahu taudia iboudiai daediae, lohia iboudiai daediae; ia ladaula danu lada iboudiae, ina mauri ai bona mauri gabena ai, e hereadiamu. ²² Dirava ese ḡau iboudiae ia aena palapaladia henudiae e ato, bona ḡau iboudiae ikwaradia ai vada e halaoa, ekalesia lalonai. ²³ Ekalesia na Keriso tau-anina; ḡau iboudiae e haḡuḡurumu Tauna ihaḡuḡuruna.

2

Ita na bese tamona Keriso lalonai

¹ Umui ese kara havara bona kara dika lalodiai o maseva; ² gunaguna ina tanobada ena kara o karava, guba padana siahuna lohiana o badinaiava, laumana bunai gwau-edede memerodia lalodia ai e ḡaukaramu.

³ Ai iboumai ai danu, gunaguna idia ida a nohova, tau-anina ena ura a karava; tau-animai edia ura bona lalomai edia ura a badinava, bena ahumai korikorina na badu, taunimanima oredia heḡeregeredia. ⁴ A hebogahisi-bada Diravana ese, e ura henimai lalo-dika dainai, ⁵ kara havara ai a mase taumai na Keriso ida e hamaurimai. Umui danu harihari-bada ese e hamaurimuimu.

⁶ Ia ida vada e hatoreda isi, ia ida danu guba ai vada e hahelaida, Keriso Iesu lalonai. ⁷ Vairada negadia ai danu ena harihari-bada bona ena gado namo ita edai baine hedinarai, Keriso Iesu lalonai.

⁸ Badina be harihari-bada ese vada e hamaurimui, abidadama dainai; dia sibomui ese, a Dirava ena harihari-bada ese; ⁹ bona dia ḡaukara daidiae, tau ta baine heagi na garina. ¹⁰ Badina

be ita na ia imana ai e karada tauda, Keriso Iesu lalonai vada e havarada, ġaukara namodia ikaradia totona: ġaukara namodia bunu Dirava ese vada e heġaeġaelai, ita ese baita kara.

¹¹ Taunabunai, ba helalo: umui na gunaguna idau bese taumui; peritome taudia na tau-anidia vada e ivadia dainai “asi peritome taumui” e gwauraimuiva. ¹² Una negana ai umui bona Keriso na mai padamui; umui bona Israel besena danu mai padamui; herohemaino gwauhamatidia na asi dibamui; asi emui helaro bona asi emui Dirava tanobada ai. ¹³ A gunaguna dauhai o nohova taumui na harihari Keriso Iesu lalonai vada o kahikahimu; Keriso rarana ese vada e harakamui kahi. ¹⁴ Badina be ia na eda maino; ia ese bese ruaosi vada e hatamonada; e hapararada maġuna vada e raġaia. ¹⁵ Ia tau-anina ai ia ese taravatu ena hahedua iboudiai vada e haore, beseda ruaosi amo matamatana ta baine havaraia, bona maillo baine haginia, ¹⁶ bona ena satauro dainai ruaosi Dirava enai baine hatamonada, helaoreana. Eda heinai-heheni ia ese satauro dorina ai e ha-orea.

¹⁷ Benaini, ia ema, maino e harorolaia, umui dauhai o nohomu taumui emui, bona gabu kahikahidia ai e nohomu taudia edia. ¹⁸ Ia dainai umui bona ai na Tamada dekenai baita raka vareai diba, Lauma tamona lalonai. ¹⁹ Taunabunai, umui na harihari dia idau bese taumui, dia noho-hedoahedoa taumui; umui na helāġa taudia ida hanua tamona taumui; umui na Dirava ena rumta taumui. ²⁰ Apostolo taudia bona peroveta taudia latadiah vada e hadaimui, rumta na heto; rumta daigunina nadina

na Iesu Keriso sibona. ²¹ Ia latanai rumā idoinai e larebaia daemu, dubu helağāna ai bainela, Lohiabada lalonai. ²² Ia latanai danu umui e larebamui heboumu, Dirava ena ruma ai baola, Lauma lalonai.

3

Lau na idau bese taumui emui aposetolo

¹ Badina bunai lau Paulo na Keriso Iesu ese e ġuigu, idau bese taumui daimui ai. ² Reana vada o kamonai, ena harihari-bada dainai Dirava ese ġaukara e henigu, umui daimui ai; ³ hereva hehunina, vada na torea kwadoġi ġauna, ia ese e hahedinarai henigu. ⁴ Iduahina ai do ba diba, lau na Keriso sivaraina hehunina na mai dibagu. ⁵ Uru gunadia ediai se hedinarai; a harihari ena aposetolo taudia helağadía bona peroveta taudia na Lauma ese vada e hahedinarai henidia. ⁶ Herevana binai: idau bese taudia bona Iuda taudia na ahudia be tamona, bona tauanidia be tamona; gwauhamata tamona danu e abia heboumu Iesu Keriso lalonai, sivarai namo dainai. ⁷ Dirava ena harihari-bada dainai ena siahu ese egu ai vada e ġaukara, sivarai namo isiaina ilaoħenina taugu ai vada e halaogu.

⁸ Helağā taudia iboudiai lau mo sibogu maraġi-maraġi herea; to ia esevada e harihari henigu, bese idau-idau vairadai Keriso ena taġa, iduahina ta asi dibana taġana, baina harorolaia, ⁹ bona ġau iboudiai ikaradia Diravana ese sene negadia ema harihari vada e hunia herevana anina baina hahedinaraia taunimanima iboudiai ediai. ¹⁰ Harihari, ekalesia ena amo, lohia hereadia bona siahu taudia, guba ai e nohomu, ese

Dirava ena aonega idau-idau bae diba, ¹¹ nega hanaihanai e lalo-hadailaia heğereğerena ai, Keriso Iesu eda Lohiabada lalonai e hamomokania. ¹² Ia lalonai ita na mai boga-aukada bona mai goadada baita raka henia kahi, ta abidadama heniamu dainai. ¹³ Taunabunai na noimuimu, daramui basie doko umui bagumui ai na hisi-hisimu; lauegu hisihisi na umui ihahairaimui ġauna.

Egu ġuriġuri daimui ai

¹⁴ Una dainai lau na Tamada vairanai na hetituimu. ¹⁵ Bese iboudiai guba ai bona tanobada ai be ia nemaina. ¹⁶ Na noiamu, ia hairaina taġadia amo ia Laumana ese siahu baine hemimui, bena lalomui idoidiai do bae goada, ¹⁷ bona emui abidadama dainai Keriso na umui lalomui ai baine noho. Bena lalokau ai ba gini tutukatutuka bona ba badinaia tarika-tarika dainai, ba goada momokani; ¹⁸ bena helāġa taudia iboudiai ida Keriso ena lalokau lababana bona rohana bona harana-latana bona dobuna ¹⁹ vadaba diba, bona basita diba ġuguru lalokauna, Keriso ena, danu. Unu amo Dirava ena honuhonu-dae ese baine hahonumui.

²⁰ Ita laloda ai mai siahuna ida e ġaukaramu Diravana do baine ġaukara, ela bona eda noinoi bona eda lalo-hadai idoidiai baine hereadia; ²¹ ia hairaina be ekalesia lalonai bona Keriso Iesu lalonai baine mia, ela bona uru iboudiai ela hanaihanai. Amen.

4

Mauri matamata ekalesia tamona lalonai

¹ Badina bunai lau, Lohiabada ese e īguigu taugu, na hahealo henimuimu: ba raka, e boirimui rakana heğereğerena. ² Lalomui bae manau, bae manada, bae haheauka. Lalokau ai ba haheauka heheni. ³ Lauma ena lalo-tamona ba kahua tao, maino ena īgui ai. ⁴ Tau-anina be tamona; Lauma danu tamona; e boirimui negadia ai boiboi helarona na tamona; ⁵ Lohiabada na tamona; abidadama na tamona; bapatiso na tamona. ⁶ Dirava danu tamona, ia na taunimanima iboudiai Tamadia; ia ese iboudiai e hereadiamu, iboudiai e rohediamu, iboudiai lalodiae e nohomu.

⁷ Ita ta ta harihari-bada vada eme henida, Keriso ese ena herahia e hahetohoamu hegereğerena. ⁸ Una dainai ini e torea toma:
Ia e dae atai ai,
Ena abi-mauri taudia mai īguidia ida e hakaudia lao;

Ena herahia na taunimanima e henidia.

⁹ Ina hereva “la e dae” anina be dahaka? Anina binai: e diho guna ela bona tanobada henuna kahana, ani? ¹⁰ E diho tauna danu e dae, guba doriva-dorivana ela, īgau iboudiai baine hahonu helaoreana. ¹¹ Ena herahia be haida e hen, aposetolo taudia ai baela; ma haida e hen, peroveta taudia ai baela; ma haida sivarai namo iharorolaina; ma haida hereğu taudia bona hahediba taudia ai baela. ¹² Ini e kara toma, ia ese Dirava ena helağā taudia iboudiai baine reğudia, bena idia ese Keriso isiaina bae lao hen, bena Keriso tau-anina bae larebaia dae; ¹³ ela bona ita iboudai eda abidadama baine tamona bona eda diba danu baine tamona, Dirava Natuna; ela

bona tauda bae lo, Keriso tauna e lo hahetohona heğereğerenā.

¹⁴ Bena memero karukarudia heğereğeredia basita noho; hahediba herevadia lai na heto basie hureda dae hureda diho; taunimanima edia kara gagevagagevadia bona koikoidia basiehakauda kerere. ¹⁵ A hereva momokani na lalokau ai baita gwaurai; bena unu kara ai baita bada oho bada oho, ela bona Keriso enai baita kau; ia na eda orea ikwarana. ¹⁶ Ia enai garugaru iboudiai e ġaukara heboumu, bena tau-anina idoinai vada e hesiriu kaumu bona e hekamo boumu, bona rege ta ta ena ġaukara ena ġaukara e karamu; unu amo tauanina e bada oho bada ohomu, bona lalokau ai e tubumu.

Mauri matamatana ena kara

¹⁷ Taunabunai, Lohiabada lalonai na halomuimu, na tomu, harihari ela basio raka dibura taudia heğereğeredia; idia na edia lalo-hadai kavakavadia ai e rakamu ¹⁸ Lalodia na didibura; Dirava ena mauri ai idia na asi ahudia, edia mata-lahui bona edia lalo-duhu daidiai. ¹⁹ Mami namodia asie abimu; a lebulebu daladia ai e rakamu, bona mata-dika karadia e ura henilalodikamu.

²⁰ A Keriso enai vada o diba dalana na dia unuheto. ²¹ Ia gadona vada o kamonai, ia lalonai vada o hahediba, hereva momokanina Iesu ena amo vada o abia. ²² Bena tau gunana mai ena kara ida ba doki oho; ia na dika, badina be koikoi e ura heniamu. ²³ Daramui ba hamamatata, ²⁴ tau matamatana ba hahedokilaia, Dirava heida-idana, kara maoromaoro ai bona hereva momokani helağana ai vada e karaia.

²⁵ Taunabunai, hereva koikoidia ba nege daure, dekemui taudia ida hereva momokani mo ba gwaurai; badina be ita bona idia na tau-anina tamona regedia. ²⁶ Ba badu, to basio kara dika; dina do basine diho ai emu badu baine doko. ²⁷ Lalomui iduaradia basio keho diabolo ena. ²⁸ Henao tauna na basine henao lou; ġaukara namona ta imana amo baine karaia, bena e dabumu tauna na baine durua diba. ²⁹ Hereva mirodia udumui amo basie lasi; hereva namodia ba gwaurai, taunimanima lalodia ba hapararalai, bena bae kamonai taudia ese harihari-bada bae abia. ³⁰ Dirava ena Lauma Helaġa basio turia riki henia; ia ese vada e abumui hidi, ia toana emui ai baine mia ela bona hahemauri dinana. ³¹ Heiri-heiri, daġedäge, badu, heloġo-heloġo, hereva mirodia, hahebade, iboudiai ba nege daure. ³² Ba hekaha heheni; ba hebogahisi heheni; emui dika ba hegwau tao heheni, Dirava ese Keriso lalonai emui dika vada e gwau tao na heto.

5

¹ Taunabunai, umui, Dirava natuna, ena lalokau, Dirava ba haġoia. ² Lalokau ai ba raka, Keriso ese e lalokau henida heġereġerena; ia sibona e hen, ita daidai, herahia ġauna bona boubou ġauna mai bonana namona, Dirava ena.

³ Heuda-hanai bona mata-dika bona mata-ġaniġani na bogaragimui ai basio herevalai; helaġa taudia edia dala bunai. ⁴ Lebulebu, kavakava, hevaseha herevadia danu dia nanamo; a hahenamo herevadia hari namo. ⁵ Dibamui, auli, heuda-hanai tauna bona mata-dika tauna bona mata-ġaniġani tauna na asi ahudia, Keriso

bona Dirava edia basileia lalonai; idia be kaivakuku itomadiho-henidia taudia na heheto. ⁶Tau ta ese hereva kavakavadia basine koilaimui; badina be unu ġāu daidai Dirava ena badu na gwau-edede taudia latadai e kaum. ⁷Badina bunai, idia ida basio hetura. ⁸Badina be gunaguna umui na didibura, a harihari umui vada ome diari, Lohiabada lalonai: ba raka, diari memerodia heğereğeredia. ⁹Badina be diari huahuadia na lalohadai namodia ai bona kara maoromaorodia ai bona hereva momokanidia ai e hedinaraimu. ¹⁰Lohiabada ihamoalena karana na ba tahua. ¹¹Dibura karadia asi huahuadia na basio hetura henidia, a ba hahedinaraidia; ¹²badina be edia kara hehunidia igwaurai-hedinaraidia na mai hemaraina. ¹³A e hahedinaraidia ġaudia iboudiai na diari ese e hahedinaraimu; badina be e hahedinaraimu ġaudia iboudiai na didiari. ¹⁴Badina bunai hereva na e tomu,

Mahuta taumu e, a nog;

Mase taudia bogaragidia amo ba tore isi;

Keriso ese diari baine henimu.

¹⁵Taunabunai, emui raka nahuana ba tohoa; aonega taudia heğereğeredia ai ba raka, dia kavakava taudia na heheto. ¹⁶E henimui negana ba ġaukaralaia namonamo, badina be ina na nega dikana. ¹⁷Benaini, basio kavakava; Lohiabada ena ura ba diba ġoeva. ¹⁸Vine ranuna basio inua momo, keker garina; a Lauma ese baine hahonumui. ¹⁹Ba hereva heheni, salamo ai bona ane ai bona lauma anedia ai. Ane bavabi, bona Lohiabada ba hanamo a lalomui ai. ²⁰Nega idoinai Tamada Dirava ba hanamo, ġāu iboudiai

daidiai, eda Lohiabada Iesu Keriso ladana ai.
21 Ba hemataurai heheni, Keriso o matauraiamu heğereğerena.

Hahealo herevadia

22 Hahine e, adavamui ba kamonai henidia, Lohiabada boma kamonai henia heğereğerena.
23 Badina be tau na adavana kwarana, Keriso na ekalesia kwarana na heto; ekalesia na ia tauanina, ia danu ekalesia ihamaurina. **24** A ekalesia ese Keriso e kamonai heniamu heğereğerena, hahine ese ġau iboudiai lalodiae adavadia unu bae kamonai henidia toma.

25 Tatau e, adavamui ba lalokau henidia, Keriso ese ekalesia e lalokau henia na heto. Ia dainai sibona e hen, **26** ena hereva amo ranu ai e huria, baine hahelāgħa, **27** ma baine abia iena; ekalesia mai hairaina, asi toutouna, asi makukuna, asi berona; baine helaġa asi bebeka-bebekana helaoreana. **28** Unuhetomana tatau ese adavadia bae lalokau henidia, sibodia tau-anidie e lalokau henimu heğereğerena. Adavana e lalokau heniamu tauna ese sibona e helalokaumu. **29** Badina be tau ta ese sibona tau-anina se inai heniamu, to e ubuamu bona e dosiamu, Keriso ese ekalesia e ubuamu bona e dosiamu heğereğerena. **30** Badina be ita na ia tau-anina regena. **31** “Badina binai tau ese tamana sinana baine rakatanidie, adavana mo enai baine tao, bena raruosi vada tauanina tamona na heto.” **32** Ina hereva hehunina anina na bada; to lau ese Keriso bona ekalesia na gwauraidiamu. **33** Benaini, umui tatau ta ta adavamui ba lalokau henidia, sibomui o helalokaumu heğereğerena. Hahine danu adavana baine matauraia.

6

¹ Memero kekeni e, tamamui sinamui ba kamonai henidia, Lohiabada lalonai, badina be ena na maoro. ² “Tamamu sinamu ba matauraidia,” (ina na hahegōni mai gwauhamatana gini-gunana), ³ “bena ba namo, ba mauri daudau tanobada ai.”

⁴ Tama e, natumui basio habadudia, a Lohiabada ena hahediba herevadia bona ena sisiba herevadia ba ubulaidia.

⁵ Hesiai memeromui e, biagumui tanobada ai ba kamonai henidia mai heude-heudemui ida bona mai lalomui tamona ida, Keriso boma kamonai henia hegeregērena. ⁶ Isiaidia ba lao henid, dia vairadiai mo, taunimanima ihamoaledia e uramu taudia na heheto, a Keriso ena hesiai taudia ese Dirava ena ura e karamu mai lalodia ida na heto. ⁷ Emui hesiai ilao-henina ba karaia mai lalo-manaumui ida, Lohiabada enai boma karaia na heto. ⁸ Umui dibamui ita ta ta baita kara namo negadia ai na davada baita abi, Lohiabada ena amo; iñgi tauna eiava ura-kwalimu tauna, dava tamona.

⁹ Biagu e, kara hegeregēredia ba kara henidia; ihagarilaidia herevadia na ba hadoko. Umui dibamui umui bona idia Biagumui be tamona guba ai; ia ese taunimanima toadia se lalomu.

¹⁰ Hereva dokona binai: Lohiabada siahuna ai ba siahū, bona goadana ai ba goada. ¹¹ Dirava ena tuari dabuadia iboudiai ba hahedokilai; bena ba goada, diabolo ena kara dibaka ba laoa ahu. ¹² Badina be ita eda tuari na dia taunimanima ida, a ġaubada hereadia bona siahū taudia bona tanobada diburana lohiadria bona lauma dikadia guba gabudia ai ida ta tuarimu.

¹³ Una dainai Dirava ena tuari dabuadiah iboudiai ba hahedokilai, bena dika dinana ai ba laodia ahu diba; ġau iboudiai ba kara ġuguru, bena ba gini. ¹⁴ Benaini, ba gini: koekoemui ai hereva momokani ba ġeġea; kememui ai kara maoromaoro ba hadabualai; ¹⁵ aemui palapaladia sivarai namo mainona iseuna ba kumilai. ¹⁶ Nega idoinai abidadama kesina bavabia kau, unu amo Tau Dikana ena diba lahidia ba habodo diba. ¹⁷ Hahemauri bavabia, emui kwara ġauna; bona Lauma ena dare, Dirava ena hereva bunai.

¹⁸ Ĝuriġuri bona noinoi iboudiai Lauma lalonai ba gwaurai, nega idoinai. Ba gima malakamalaka; helaġa taudia daidiae ba noinoi, ¹⁹ lau daigu ai danu ba noinoi, baina haroro negadia ai sivarai namo ena hereva heħunidie baina hahedinarai ġoeva ġoeva. ²⁰ Badina bunai lau na hesiae taugu mai iġuigu ida na nohomu. Lau daigu ai ba noinoi, baina hereva goadagoada, vada e haduagu heġereġerena.

**Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini**

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2